



Sesida dals

20 d'october 2025

Communitgà ils

21 d'october 2025

Protocol nr.

742/2025

Dumonda Kaiser

concernent il svilup da las tariffas da las canortas en il chantun Grischun

Resposta da la Regenza

Cun la revisiun totala da la Lescha davart la promoziun da la tgira d'uffants complementara a la famiglia en il chantun Grischun (LTGU; DG 548.300) èsi vegnì midà sistem. Entant che las subvenziuns vegnivan concedidas sut il sistem vegl tenor il princip da repartiziun eguala, è la situaziun finanziaria concreta da las famiglias decisiva sut il nov sistem per reparter las subvenziuns. Cun la revisiun da la lescha augmentan il chantun e las vischnancas tut en tut il volumen da las subvenziuns da 40 sin 60 pertschient dals custs normads (CN) (cf. quint annual 2023: 9 071 076 francs, preventiv 2026: 14 235 000 (excl. KITApplus)). Sco valur da referenza per la midada tranter il sistem vegl ed il sistem nov servan ils CN, perquai ch'els existan sut tuts dus systems e vegnan calculads tenor la medema metoda. Ils CN s'orienteschan a la media dals custs dals furniturs da prestaziuns (art. 6 LTGU). Per il 1. d'avust 2025 ha la Regenza fixà ils CN sin 116.60 francs per di da tgira ed ha pia augmentà quels per 6.60 francs resp. 6 pertschient envers l'onn precedent. Ils furniturs da prestaziuns han medemamain adattà lur tariffas. Sut il sistem vegl avevan tut las canortas d'uffants tariffas cun diversas graduaziuns, differents dumbers da stgalims e per part er rabats individuals. Quels fixavan ellas en lur purschidas, tranter auter tenor la structura da las entradas e da la facultad da las famiglias. Sut il nov sistem fixeschan las canortas d'uffants custs da tgira per ura. Graduaziuns da las tariffas tenor la situaziun da las entradas e da la facultad n'èn betg pli necessarias. Dapi il 1. d'avust 2025 sa chatta la media da las tariffas per 15.73 francs resp. per 13 pertschient sur ils CN fixads.

Tar la dumonda 1: Las reducziuns dals custs s'orienteschan als CN e vegnan calculadas per las famiglias a maun da las entradas decisivas, analogamain a la reducziun individuala da las premias. La basa èn las datas fiscalas definitivas da l'onn precedent. Il sistem vegl sa basava sin las entradas suttamessas a la taglia plus 10 pertschient da la facultad. Sut quest sistem pudevan famiglias cun pussaivladads finanzialas pli grondas cuntanscher in stgalim tariffar pli bass grazia a deducziuns (p.ex. investiziuns en immobiglias, contribuziuns a las pitgas da provediment 2 e 3a e.u.v.).

Quai n'è betg pli pussaivel cun la nova calculaziun. Pervia dals differents facturs d'influenza e pervia da l'alta individualitad n'èsi actualmain dentant anc betg pussaivel da far ina bilantscha. Cun datas fidablas davart la situaziun generala pon ins far quint l'onn 2026.

Tar la dumonda 2: La nova LTGU ha differentas finamiras. Tras il nov model da finanziaziun duain las subvenziuns vegnir pajadas d'ina vart en moda effizienta e cun cleras finamiras. Da l'autra vart duain vegnir sustegnidas en moda efficazia las finamiras politicas da la cumpatibilitad da la famiglia cun l'activitad da gudogn sco er da la promoziun dal svilup dals uffants (guardar missiva tar la LTGU, carnet nr. 5 / 2022–2023, p. 351). Sut il nov sistem sa mussi, che famiglias cun entradas bassas fin mesaunas survegnan per regla reducziuns dals custs pli autas dal maun public. Quai resulta da la graduaziun da las reducziuns dals custs ed è gia visibel en la pratica. Las reducziuns dals custs maximalas cumenzan tar 90 pertschient dals CN per entradas decisivas fin 40 000 francs, las pli bassas reducziuns dals custs importan 25 pertschient dals CN a partir d'entras decisivas da 130 000 francs. En cas d'entras autas pon las tariffas da canortas pli autas, las deducziuns che crodan d'avent per calcular las entradas decisivas e la concessiun sistematica da las subvenziuns avoir per consequenza ch'ils custs per la tgira d'uffants èn s'augmentads. En quest connex sa mussi, che la descripziun davart ils fauss svilupps tar il subvenziunament da fin ussa en la missiva (cifra II.2.2, p. 370) è correcta. La finamira da la LTGU da diriger meglier las prestaziuns da sustegn cleramain pli autas sco er da tractar en moda eguala las famiglias ed ils furniturs da prestaziuns èn gia vegnidas cuntanschidas cun la finanziaziun sur las reducziuns dals custs. Las ulteriuras finamiras na pon actualmain anc betg vegnir giuditgadas.

Tar la dumonda 3: En connex cun l'introducziun d'in nov sistem da subvenziunament è in monitoring central. La Regenza vegn ad analisar il svilup e las consequenzas da la midada da la finanziaziun e da l'utilisaziun da las purschidas da la tgira d'uffants complementara a la famiglia. Sch'igl exista in basegn da correctura, è la Regenza pronta da far questas correcturas per cuntanscher uschè bain sco pussaivel las finamiras da la revisiun.



En num da la Regenza

Il president:

Marcus Caduff

Il chancelier:

Daniel Spadin